

東瀛詩選

下
冊

〔清〕俞樾編

曹昇之
歸青點校

中華書局

〔清〕俞樾編 曹昇之歸 青點校

東瀛詩選

下冊

中華書局

東瀛詩選卷三十一

曲園居士俞樾編

大沼原

〔一〕字子壽，號枕山，江戶人。著《枕山詩鈔》三卷。

枕山於詩學，頗近香山一派。其論詩有云：「詩無定法意所屬，不要疏宕要精熟。不古不今成一家，枯淡爲骨菁華肉。」可得其大概矣。東國人詩集每集必有數序，此集止於卷首自書「千古寸心」四字，不乞人一序，頗有名貴之氣。

曉發箱根

曉發箱根驛，長庚光晰晰。孤村猶燈火，隔樹遠明滅。天寒客衣單，朔風逾凜冽。帽屋雲先覆，裘茸霜自結。東方紅一閃，朝暾出山缺。奇峰束髻鬟，暗泉響環玦。崢嶸捫鵲巢，崎嶇經狼穴。蜀道一何難，羊腸幾九折。世路甯異此，危險何可說。我性忤且愚，我才

〔一〕「原」原誤作「厚」，據《東瀛詩記》改。

薄且劣。遷喬非所期，考槃計亦拙。漂泊任浮萍，千里輕離別。歲月速如電，鼎鼎忽暮節。青史業未成，有愧古明哲。遠遊非不樂，其奈鄉思切。小憩踞巉巖，仰看芙蓉雪。山色秀可餐，雪華清可啜。多時忘羈愁，客心自清澈。遙天鶴一聲，詩思沖寥沏。

涼宵待月對古人齋席上分韻

雨餘林院嫩涼添，無復飛蚊繞四檐。明月忽來如有約，清風多取不傷廉。竹香細撲虬紋簟，柳影斜籠蜺翼簾。更向中庭成露坐，吟拌半夜紵衣沾。

平久里

此地曾屯萬甲兵，山形仍舊碧崢嶸。戍荒無復鼓鼙響，村古唯聞雞犬聲。今我昔人真一夢，潭光雲影自雙清。登臨幾度感興廢，禾黍茫茫何限情。

野島

目斷南天欲盡頭，烟波浩渺晚涵秋。日沈極浦驚征雁，潮捲寒沙起睡鷗。松樹有情皆護石，蘆花無處不藏舟。舵師指點迎人說，一髮青山八丈洲。

晚春書懷

客懷孤寂影相親，半壁青燈照隻身。隔水鐘聲寒帶雨，滿樓花氣淡籠春。風光流轉唯拌醉，世事艱虞獨守貧。非有邑人攜酒至，天涯何處不傷神。

玉井冰鑑自柏崎至相攜飲墨川酒樓

故人又作大城遊，聯袂來登賣酒樓。孤劍曾傷千里別，一杯忽洗十年愁。夕陽遠寺鐘聲盡，秋水長天雁影流。猶記昔時分手處，寒煙殘柳古灣頭。

梅雨會九萬宅席上次懷之韻

綠鎖園林暮色奇，依依風柳散纖絲。客來窮巷深泥裏，門掩連陰綿雨時。三載淡交真似水，一宵清話自成詩。杜陵只得蘇端足，置酒何求俗士知。

曉遊小西湖

半湖秋色早涼歸，候曉來敲島寺扉。風裏花香浮酒盞，霧中山翠滴吟衣。銀塘水淺紅鴛睡，畫閣煙深白燕飛。一吼蒲牢朝日現，錦雲平展曝晴暉。

筑波山歌

常之野，何莽蒼，南接總武平如掌。惟看馬耳攬天高，青尖插空幾千丈。不與他山爭秀偉，雄尊自是衆所讓。雙峰映立比麗娟，何止彭郎對姑山。女峰爲凹男峰凸，岳神相配非偶然。行雨行雲日暮作，翠帷瑤席有無間。別有兒孫互補佐，樺嶺葦嶺列其左。山脚遠走入渺茫，餘勢龍跽又虎卧。鐵鎖千尋豈易攀，白壁蒼厓誰鑿破？我來正逢秋索寞，漫山霜霰浩漠漠。陰壑晝暗魑魅嘯，怪石奮動怒欲落。神也有待邀我遊，冷風吹衣如乘鶴。

鴻臺歌

寺前十里松風長，清陰滿地苔蘚蒼。一逕斗折通幽處，白日光寒古戰場。荆榛塞路高過膝，岸頽沙落石爭出。山僧引我看陳迹，前事說來頗一一。櫻花陣空草含煙，芙蓉臺廢樹接天。千載殘碑倒絕壑，萬石巨鐘沉深淵。高崖下瞰如壁立，相軍無翼自何入？誰知奇策出不意，夜渡淺瀨登嵬岌。恃險苟安自受侮，鐵作堅城亦一炬。江水激怒揚素波，英雄堙滅委黃土。後車不戒事茫茫，今古胡爲據金湯？相州更有箱根險，五世鴻基一旦亡。

歲晚雜感

人事匆匆歲籥更，寄居蕭寺若爲情。薄雲韜月慘無色，疎木漏風寒有聲。愁裏嬾看新歷冊，貧來只對舊燈檠。何當辦得湖中宅？梅鶴相攜過一生。

功名博得一閒眠，范釜生塵亦偶然。毳衲蒲團仍故我，梅花雪片又新年。只銷杯裏忘憂物，敢乞人間造孽錢。自笑身謀迂闊甚，欲將破硯當良田。

過墨水某廢園

畫樓不見舊岩堯，路上行人魂欲銷。荒地入官蛙閣閣，閒花無主犬寥寥。壽非金石誰能保？勢似冰山自易消。芳草滿庭歌舞歇，春風吹恨長新苗。

歲晚書感

衣上塵埃歲欲窮，客蹤何事尚飄蓬？慈親衰鬢添新白，遊子愁顏減舊紅。征路山川猶臘雪，故園松竹又春風。因循未作歸來計，病在寒山萬木中。

三月十九日拉諸子遊墨水作長句

江上今年異昔年，尋芳逐隊亦狂顛。空樓鶯燕鎖無主，廢苑荆榛鋤作田。酒醒落花風裏

榻，人歸流水霧中船。惜春何負暫時賞，明日綠陰啼杜鵑。

中秋同橫山懷之縣晴峰中莖孔通遊墨水賞月于棹月樓夜半

僦舟而歸

清風掃盡宿雲收，明月已昇高樹頭。仰向青天先一笑，八年無此好中秋。
禁奢令出城中肅，無復遊船簇水津。好在白鷗沙上月，最圓夜屬最閒人。
墨江美酒天下無，墨江明月冠大都。好攜美酒看明月，不醉江樓也自愚。
輕船掉破波心月，來上墨江第一樓。換却平生寒乞相，畫簾銀燭賞清秋。
總水房山盡歷觀，清光何似墨江干。自今便息飄萍恨，明月明年又此看。
夜潮拍岸淡煙遮，狼藉杯盤月欲斜。醉倒不知風露冷，金波搖夢下三叉。

送彥之

吾徒詩社不乏人，高材逸足皆絕倫。少年意氣賈餘勇，筆陳何啻掃千軍，惜哉未能脫俗好，正門大路得者少。銅碗龍吟人人同，認僞爲真拙爲巧。詩道似盛日以衰，正始之音有誰知？豈無二三非常士，支顛扶倒在此時。鈴氏之子今才雋，騷壇卓幟天所命。古人

贈別必以言，我有數言子且聽。詩無定法意所屬，不要疎宕要精熟。不古不今成一家，枯淡爲骨菁華肉。俯仰天地皆新句，森羅萬象供才具。行雲流水無粘筆，生意活潑得真趣。我告吾子蓋止茲，子歸努力有餘師。

送星巖梁翁西歸

魚知潛伏鳥知還，莫怪高人戀故關。巢父佯狂將入海，浩然本意在歸山。音容一別暮雲外，唱和十年春夢間。明日橋頭分手處，雨痕淚點滿襟斑。

十一月廿六日夜雪河野子貞見訪追次坡公聚星堂韻倣禁體格

萬樹一色失黃葉，夜來窗外盈尺雪。光侵紙帳忽空明，聲落畫檐更清絕。佳客踵門蓑袂鳴，懽迎下階屐齒折。雖無絲竹堪陶瀉，自有風流不磨滅。愁懷得酒春冰融，狂腕援筆秋蛇掣。何啻吟肩作山字，又看醉面生桃纈。欲將雀舌洗餘醒，好把烏甌烹落屑。閒遊一夜同萍聚，清景暫時如電瞥。詩思豈向灞橋去，故事須從汝南說。明時不樂又如何？無復戰馬夜銜鐵。

載庵即事

庵廬塵事少，坐卧養幽情。閒向病餘得，道從貧後成。稻花看野色，荷葉聽湖聲。此際宜真隱，柴扉掩姓名。

小湖看荷花有感寄懷彥之

都門正月送君歸，北風其啗雨雪霏。楊柳弄色不相見，忽到蓮子花開時。今晨載酒何不樂？故人又負觀蓮約。風物雖好空斷腸，何況繁華今異昨。憶昨相喚飲蓮塘，手截碧筩不須觴。滿座啁啾絲管沸，倚歌促酒幾紅妝。醉遊盡日不知飽，長鯨一吸百川小。頗類分司御史狂，狂言往往驚娥媯。此時水心花的的，花色水光香霧白。夜深月上同忘歸，結鄰欲卜煙波宅。一朝雲雨散同遊，舊盟只賸水中鷗。湖蓮憔悴少顏色，湖上名園半掩樓。近來逾覺世議隘，豪舉無由取一快。舞衫歌扇拋何邊？酒場花所多荒廢。勝地無人鳴蛙，豈啻西湖事可嗟。緘辭千里寄相憶，暮雲黯澹天一涯。

中秋與昆溪湖山毅堂將爲觀月之遊適秋浦至遂泛墨水賦長

句以記事

去年中秋天黯慘，江樓沾醉興不淺。今年中秋又陰寒，舊遊踐約其當勉。不速而來皆佳客，邂逅適願今何夕？出門四面頑雲遮，飛雨掠衣如箭鏑。忙向清灣買畫舟，繞船江水寒煙白。有酒如澠肴如邱，一葦茫然萬頃秋。諷詠誰問袁宏渚，神仙人望李郭舟。百觴堪緩憂心擣，何況吾曹百無憂。醉來揭窗雨忽絕，寒鴉飛盡隄樹幽。鐘聲依約暗中寺，燈火淒迷遠處樓。水源回掉暮潮急，指顧已失金龍塔。長橋如虹頭上懸，繫舟攀岸草露濕。近市婆娑遊人多，星球照路紅匝匝。街頭擊柝報二更，衆客欲歸吾不答。強向郭門問酒家，餘勇猶能倒數榼。興盡返家夜已闌，四鄰寂寞簫笛殘。卷簾推戶仰天立，崩雲脫壞露冰盤。坐客驚呼喜欲舞，咄嗟辦酒更重看。茅屋雖陋還可樂，吟坐最宜秋澹泊。我醉欲眠君且卧，相對蒲團殊不惡。須臾滿牀鼾聲大，不覺西巖斜月落。

三十生日酒間自詠

高吟大醉是前緣，故態難除尚放顛。廬岳僧稱方外友，長安人喚飲中仙。浮沈忽過歲三十，事業終歸詩幾千。占得江湖雲水福，豈將窮達問高天。

暮春感興

特地蜂愁蝶也驚，流光向老太憐生。風前花碎殘春色，煙外鐘傳薄暮聲。人人中年先抱感，天於三月最鍾情。碧窗紗外朦朧月，滿目傷心畫不成。

新秋同藤井士開橫山懷之飲小湖清容亭分韻

佳期卜得屬新涼，歌笑聲中引興長。山水奇於名士畫，芙蓉艷似美人妝。一家無熱最宜醉，四面有風渾是香。不用更追河朔飲，祇應痛快吸湖光。

中秋同懷之及田村考叔植村子順東橋買船到棹月樓是夜月色奇明夜半又登某樓分韻賦此

何處朱門不待賓，佳期別在墨江濱。十年幾度逢明月，一夜同遊盡可人。蟾窟堪攀丹桂樹，星槎欲訪絳河津。醉來飽吸清華氣，白玉壺中寄此身。

又趁芳洲清夜娛，金花美酒玉花鱸。晴煙沙際拖輕縠，明月波心弄大珠。壯麗樓臺如北固，風流士女是西湖。新詞一闋非難事，水調吾能繼大蘇。

笙歌聲裏桂輪移，地似楊州物物奇。才子襟懷狂杜牧，美人態度醉西施。清樽須盡終宵

興，圓月難逢隔歲期。但使良辰多樂事，青樓薄倖任他嗤。

中元前一夕感懷

是日河村楚芳訃至。

誰能破寂叩柴門，獨坐燈前欲斷魂。四壁暗蟲迎永夕，滿街涼雨近中元。故人何在半黃土，今我所須唯綠樽。不信死生元一理，《南華》到底是空論。

戲作勸行樂歌

人謂色斧伐其性，人謂酒兵攻其身。我愛翠娥獻笑專良夜，綠酒銷愁占好春。我生畢竟行樂耳，須擁榴裙對芳樽。黃金散盡還復到，青年一去何當還。君不見風流魏公子，美酒十千宴西園。又不見高潔謝安石，名妓提攜遊東山。千載之下令人艷，二公芳躅我欲攀。富貴功名未落手，醉舞狂歌且爲歡。湧金門外風月夕，濯錦江頭桃李辰。此景此時豈虛擲，紅兒紅友宜相親。勸君莫學佛向淨土，勸君莫求仙乘白雲。只勸溫柔之鄉麴世界，長作太平行樂人。

昆溪詩鈔題言

君不見風流秦少游，對客揮毫詩力遒。有情芍藥何絕妙，昌黎《山石》未爲優。又不見豪

放郭功甫，筆底光燄凌萬古。李謫仙人乃前身，一斗百篇可接武。意氣長似少年春，大才子是大快人。吾欽二公非一日，求諸當世豈無倫。吾莫逆友子肇氏，狂態傲世古奇士。善詩善飲仍善遊，行樂時攜東山妓。春花秋月歌吹叢，一任買笑黃金空。興酣佳句衝口出，縱橫不求點綴工。秦之風流郭豪放，其人從來所嘉尚。珠貫玉堆詩成編，持此文場誰敢抗？吁嗟乎！吾曹窮愁而已矣，閉門求句陳無已。

山寺觀早櫻用劔南梅花韻

晚櫻著花美而艷，可愛之中有可厭。況復託根郊垌邊，枉將繡樹裹茅店。早櫻清秀據上方，不御鉛華息情念。香幽仍怕微風知，影淡甯嫌初月覘。占華嚴界殊爲榮，稱智慧花亦非僭。此花雖貴迴出俗，痼在煙霞豈須砭。冶意倡容卿所無，朗吟濃醉我何欠。傳觴聯句林之下，翠草受坐平如剡。忍看春色去堂堂，敢說暮寒來漸漸。昏鐘促我未遽歸，隔花湖光明潋灩。

次韻答夢香老人

家居幸免賦懷都，且抱殘書向學徒。乞米先生吾乃在，與錢司業世皆無。病軀局束一間

屋，詩境汪洋千頃湖。尚喜黃塵污不得，高情依舊白雲孤。

中秋同毅堂香巖樂山泛舟墨水訪百花園薄暮抵棹月樓此夕

月色清佳分袁倉山四海共傳斯夕好爲韻得四字

庾樓袁渚吁邈矣，中秋之遊孰堪記。獨數明皇月宮遊，霓裳羽衣擅奇事。繼之白傅洞庭遊，皓月澄波占勝地。豪華天子閒詩客，其人風流同一致。我憾古賢尚有缺，俊遊如此但一次。曷若我遊無虛歲，月樓已博十回醉。今茲中秋暑未銷，白紵衣霑汗珠膩。泉水橋畔僦畫船，一船睦友如昆季。船頭載酒船尾絃，一彈一酌各適意。溯流而東岸之隅，花園去見秋色媚。紅衣翩翩萼飄香，紫綬若若花弄穗。彷徨不覺曜靈匿，堤松陣陣遞涼吹。却回呼船截江水，指點柳樓翠簾翠。我視水西家家樓，甲子太七拔其萃。調饌雖精境雖幽，受月之方非正位。此樓當面桂輪昇，所以諸樓不角倚。況乃盤飮競時新，羹膾之材殊珍備。急舉一杯屬諸客，百年勝遊天所賜。縱令吟朋少幾人，遊盟豈可中道棄。有唐以來且千年，人生飄忽真如寄。王侯螻螳共一邱，買歡莫說錢財匱。我曹更恃玲瓏筆，水調妙詞可幸冀。玉京桂殿神欲往，比古人遊無羞愧。美景良辰仍賞樂，此遊一併能得四。

至前看梅花

惇齋老人宅集，分韻，同董園東陵諸子賦。

牢晴漸逼南至候，一氣何處春先漏？水邊籬落寒雲覆，小梅妝點茅茨陋。地偏誰人移艇就？淡紅時映漁娃袖。我來偶爾欽良覲，尋芳肯落小杜後。愛渠不待一陽復，亭亭寒疎影瘦。頗似名士不自售，深避世榮寄巖岫。却憶盆中爭麗富，出窰唐花媚清晝。其狀奇巧雖窮究，人造安得天造壽？曷若雪澗枝條茂，清香衝風貫紫宙。此時百卉凋仍仆，一樹獨成天下秀。

仙山樓閣圖

草堂席上，限體，分題爲韻，得「山」字。

當時虎頭手，寫出好孱顏。弱水知何處？蓬萊只此山。兩行珠樹直，五色錦雲斑。傑閣飛鸞穩，脩廊舞鶴閒。追隨輕羽蓋，羅列小螺鬟。金母當中座，麻姑廁末班。玻璃魚膾白，琥珀酒花殷。誰顧謫仙子，受他塵網艱。

紅梅次坡公韻

茜裙整頓出簾遲，笑而含羞未嫁時。能逞紅嬌無俗韻，縱嫌粉瘦有清姿。瑤臺仙鶴分丹頂，紫府神人讓玉肌。怪見水邊烟月底，珊瑚幾尺化爲枝。

也知頰頰怒春遲，盡壓群芳半醉時。高舉籀霞新骨格，孤標立雪舊丰姿。密鱗綴赤老龍脊，細粟凝紅仙女肌。預恐夜寒渠凍死，試迴生術呪楊枝。

羅浮山下夢醒遲，開向晨曦澈灑時。清苦應嫌姑射貌，麗妍故擬息嫵姿。宴終酒暈浮星靨，妝罷脂痕污雪肌。認杏辨桃非慧眼，海棠別有耐寒枝。

暮春雨中書懷

倏忽春如下阪丸，回瞻庭樹綠成團。鶯花吾與汝皆夢，風雨其留誰共歡？羅幌潤侵箏柱澁，綺窗冷逼酒杯殘。風光別我年年恨，帶閨今番轉覺難。

忽忽

忽忽醉醒間，青春變朱夏。昨爲狂牧之，今乃窮東野。

將遊房州舟發芝浦口號

披雲衡岳昌黎老，冒雨黃山玉局翁。賤子也占風水便，人窮畢竟異天窮。寺樓枕海曉蔥蘢，氣象與他滕閣同。勃也奇才吾敢比，上天優貸一帆風。